

Rapport dalla seduta dil cussegl da vischnaunca dils 18 da november 2020 a Dardin.

Beinvegni ed avertura

Il vice-president dil cussegl, Tarcisi Dietrich fa a tuts presents in cordial beinvegni alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Damai ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 24 da zercladur 2020

Il protocol ei vegnius tarmess allas cusseglieras ed a tuts cussegliers. Il president dil cussegl suttametta el alla discussiun. Da tala vegn buca fatg diever. Il protocol vegn approbaus unanim (11:0) e senza cuntervuschs.

2. Preventiv e quen d'investiziun 2021

Il preventiv ei vegnius tarmess tier a tuts cussegliers per informaziun. Tal siara suenter expensas da frs. 12'982'150 ed entradas da frs. 13'247'081 cun in surpli entradas ell'altezia da frs. 264'931. Quei ei il quart preventiv che ei vegnius fatgs suenter il niev model da quen MAC2, ed aschia ha quel saviu vegnir fatgs tenor las cefras dil quen 2019 ed il preventiv 2020. Il quen d'investiziun preveda expensas da frs. 4'960'000 ed entradas da frs. 1'103'000. Las investiziuns netto muntan per consequenza a frs. 3'857'000.

Il president communal repassa il preventiv dil quen current sco era dil quen d'investiziun e dat sclariments tier tut las posiziuns. Sin las damondas tschentadas sa vegnir dau risposta. Propostas per midadas vegn fatg neginas. Il cussegl approbescha entras tscharna unanima (11:0) e senza cuntervuschs il preventiv cun quen d'investiziun 2021 per mauns dalla radunonza communal. Cun quella approbaziun ein era ils credits necessaris tenor il quen d'investiziun concedi.

Il president communal presenta aunc il plan da finanzas (investiziuns) per ils proxims 4 onns (2022 – 2025). Quei plan ei in instrument da lavur per la suprastonza e sto buca vegnir approbaus dil cussegl. Ils cussegliers han priu enconuschientscha dil plan, il qual vegn era presentaus alla radunonza communal.

3. Pei da taglia 2021

Mintg'onn han il cussegl da vischnaunca e la radunonza communal la pusseivladad da fixar il pei da taglia. Cun la fusiun ei il pei da taglia dalla vischnaunca da Breil vegnius fixaus sin 100% dalla taglia cantunala. La suprastonza fa la proposta da restar sco tochen dacheu sin 100%. La crisa da corona vegn a purtar a nus els proxims onns pli paucas entradas da taglia. Era spetga tenor il plan da finanzas in grond buordi d'investiziuns sin la vischnaunca, aschia ch'ei fuss buca prudent da reduzir il pei da taglia. Las investiziuns previdas els proxims onns savein mo far, sche las entradas da taglia restan sco tochen dacheu. Ina reducziun dil pei da taglia muntass stuschar anavos ni desister dad investiziuns. Igl uffeci da vischnauncas sustegn medemamein la proposta da buca sbassar il pei da taglia els proxims onns.

La taglia sin schischom sto tenor lescha da taglia vegnir fixada mintg'onn da niev. Quella taglia importa denter 1.5 entochen 2.0 promils. La suprastonza communal fa la proposta da restar sco tochen dacheu sin 1.7 promils.

Las damondas vegnan suttamessas alla discussiun. Ei vegn fatg viva discussiun cun buns arguments. Denter auter duessi vegnir investau pli bia el turisums da stad per saver porscher ina adequata infrastruttura als numerus hosps, quei per far vegnir pli attractiv la destinaziun turistica dalla vischnaunca da Breil. Il meini dils cussegliers ei era da schar ellavurar ora ina studia nua che la destinaziun turistica Breil savess investir il pli prudent els proxims onns. Ei vegn sclariu cun la Regiun Surselva, signur Rudolf Büchi, che ei responsabels per il svilup en Surselva. Ils differents votums dils cussegliers sustegnan la proposta dalla suprastanza da buca sbassar il pei da taglia. Era la cumissiun da quen e gestiun sustegn la proposta dalla suprastanza da buca reduzir el mument il pei da taglia. Propostas per reduzir il pei da taglia vegn fatg neginas. Cun tscharna unanima (11:0) decida il cussegl per mauns dalla radunonza communal da fixar il pei da taglia ordinari sin 100 % dalla taglia cantunala semplia ed il pei da taglia sin schischom sin 1.7 promils.

4. Elecziun dalla suprastanza dil cussegl per la proxima perioda d'uffeci

Tenor costituziun sto la suprastanza dil cussegl vegnir elegida mintga onn.

a) president dil cussegl

Cunquei che Prisca Sgier ha demissiunau sorprendentamein sin ils 30 da zercladur 2020 sco presidenta e commembra dil cussegl da vischnaunca fa il president communal la tscharna sin in niev president. Sco successur fa il vischinadi d'Andiast la proposta sin il vice-president Tarcisi Dietrich. Ulteriuras propostas dat ei buc.

Cun tscharna unanima elegia il cussegl Tarcisi Dietrich sco niev president dil cussegl da vischnaunca per la proxima perioda d'uffeci dad in onn.

b) vice-president dil cussegl

Cunquei che Tarcisi Dietrich ei vegnius elegius sco president dil cussegl sto vegnir elegiu in niev vice-president ni ina vice-presidenta. Il vischinadi da Dardin fa la proposta sin Aluis Cahannes. Ulteriuras propostas dat ei neginas.

Cun tscharna unanima elegia il cussegl Aluis Cahannes sco niev vice-president dil cussegl da vischnaunca per la proxima perioda d'uffeci dad in onn.

c) actuar dil cussegl

La suprastanza communal fa la proposta sin il canzlist Curdin Cadonau. Ulteriuras propostas dat ei neginas.

Cun tscharna unanima elegia il cussegl Curdin Cadonau sco actuar dil cussegl per la proxima perioda d'uffeci dad in onn.

5. Varia

Clau Schlosser informescha il cussegl, che entgins vischins da Tavanasa han inoltrau la damonda d'inoltrar tempo 30 atras Tavanasa. Suentar haver consultau las directivas cantunalas pertuccond il traffic sco era la polizia cantunala da traffic, ha la suprastanza decidiu, ch'ina introducziun da tempo 30 atras Tavanasa fetschi el mument negin senn. Ils iniziants ein vegni informai en in discuors personal giudlunder. El mument fuss ei buca bien d'instradar il tempo 30 a Tavanasa, e leu nua ch'ei ha in bionton dapli traffic (Danis e Dardin) far nuot.

Entgins geniturs da Danis han inoltrau in scriver alla vischnaunca cun la supplica da megliurar la situaziun e la segirtad per ils affons sin il plaz posta a Danis, cun erregier in passadi da peduns. En ina uatga sil plaz cun ils responsabels dil cantun ei vegniu analisau la situaziun. El project da sanaziun dalla via cantunala atras Danis, vegn empruau d'integrar e da megliurar la segirtad sin il plaz posta. El medem project vegn in evtl. tempo 30 atras Tavanasa e Danis integraus e sclarius giu.

Per ellavurar ora ina proposta per las tarifas d'aua e deflussiun ha la suprastanza elegiu ina cumissiun che lavura ora ina proposta. En quella cumissiun ei Sep Cathomas, Breil, Ervin Caduff, Breil, Meinrad Schmed, Breil, Corsin Albin, Danis, Adelrich Berther, Danis,

Heini Hunger, Vuorz e Clau Schlosser, Dardin vegni elegi. Igl ei previu da presentar al cussegl el proxim onn la nova proposta.

Ina cumissiu preparatorica ha ellavurau ora per la suprastanza in concept per la cultura en l'entira vischnaunca. Igl ei previu da presentar el proxim onn al cussegl la nova lescha da cultura.

El proxim onn han liug las elecziuns communalas per la nova perioda d'uffeci 2022 – 2025. Tenor constituziun ston tut ils officials sedecider sch'els vulan candidar per la proxima perioda d'uffeci. La publicaziun officiala el FUS suonda alla fin schaner 2021.

Tarcisi Dietrich engrazia als cussegliers per la presenza e la partizipaziun. El giavischa alla cussegliera ed als cussegliers in bien retuorn a casa e siara la seduta dallas 22:15 uras.

Breil, ils 19 da november 2020

Il vice-president

Tarcisi Dietrich

Igl actuar

Curdin Cadonau